

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

Khutba Jummah

HADHRAT MUHYI-UD-DIN AL-KHALIFATULLAH

Munir Ahmad Azim

03 Août 2018

(20 Dhul-Qaddah 1439 AH)

Après ki li fine salué tous so bane disciples (et tous bane Musulmans) entier le monde avec le Salaam - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor: « Plisse la Haine ki l'Amour ! ».

La Communauté Musulmane Ahmadiyya avec à la tête ene Calife élu par l'homme trompe le monde avec so bane zolis discours lor la paix et la nécessité pou ena l'amour pour tous et la haine pour personne.

En tant ki Calife et Messenger d'Allah, li mo devoir pou mette devant le monde, surtout devant tous bane musulmans Ahmadi de par le monde le vrai visage de zot calife actuel ki certainement pas pé pratique saki li pé prêcher.

Pour masquer la face, li déclare à bane dimounes ki pose li bane questions lor la situation actuel à Maurice, ene situation ki depuis déza plisse ki dix-sept ans fine tourne au vinaigre au sein de la Communauté Ahmadiyya de Maurice. Avec bane instructions, bane directives ki vine directement du Calife actuel, bane dirigeants du Jamaat Ahmadiyya à Maurice pé faire saki zot content en implémentant saki zot qualifier comme bane instructions Khalifa, bane tels l'instructions ki d'après zot, zot bizin absolument mette en pratique, malgré le fait ki sa bane mêmes l'instructions là zot contre bane l'enseignements vitales du Quran Shareef et de

Sounnah du Saint Prophète Muhammad (saws), et même bane l'enseignements du Messie Promis, Hazrat Mirza Ghulam Ahmad (as).

Au vue du monde, Khalifa (Khalifatul-Massih V) pé prêche la paix, li ene dimoune paisible, ene homme de paix. Li insister ki na pas ena problème à Maurice, ki tout correcte dans le meilleur des mondes ! Mais en vérité, pli li masquer cassure et bane massacres au niveau du Jamaat Ahmadiyya à Maurice et ailleurs dans le monde au sein de bane familles Ahmadis, plus la vérité transformer en ene vague puissant pour renverse so bane plans machiavéliques. Li prend li couma ene rassembleur, mais en vérité, li nek ene dimoune ki oulé divise bane familles et casse l'union musulmane et familiale.

Ô bane musulmans Ahmadis de par le monde, surtout bane Mauriciens, rappelle-zot, sa Khalifa ki zot pé prend couma véridique là li pas *Alim-ul-Ghayb* (li pas conne l'invisible), li pas même capable pou agir couma ene médiateur et pou juger avec *Taqwa*. Rappelle-zot centenaire du Jamaat Ahmadiyya de Maurice en l'an 2015. Après tous bane préparatifs, li pas fine vine Maurice pour écoute zot bane doléances et pou réjouir avec zot. Li conne très bien bane problèmes inquiétants ki pé passer dans Maurice, au sein de bane familles musulmanes Ahmadis, mais li pas fine vini pour régler le problème et rétablir la paix. Même en l'an 2005, durant so visite à Maurice, ki ti so devoir ? Pou faire ene face-à-face et pou cherche la vérité parski la Manifestation Divine et aussi tous bane plans machiavéliques de so Amir (maintenant ex-Amir) fine prend naissance durant le Khilafat de so prédécesseur, Hazrat Mirza Tahir Ahmad (Ki Allah pardonne li).

De ce fait, dès le début de so mandat, l'arrogance Khalifa Ahmadiyya Mirza Masroor Ahmad contre la Manifestation Divine à Maurice et de par le monde fine être destructif.

Li ene principe inchangeable, kot tous bane musulmans d'accord lor là, ki Allah fine réserve pou Li-même, pour Li tousel, la décision pou guide bane dimounes dans le chemin de la vérité. Pour sa, Allah fine touzour élève, dans plusieurs l'époque et l'endroits, bane dimounes à ki Li fine accorde le vêtement d'honneur pour zot vine So bane représentants auprès de bane dimounes. C'est par le biyé de sa bane dimounes avec bane l'âmes nobles et purifiées là ki Allah révèle à bane dimounes le chemin ki Li fine choisir pour zot. D'après langage Quran, sa bane représentants d'Allah là, appelle zot Khalifatullah/ *Khulafatullah* (Califes d'Allah).

Le Khalifatullah li pas crée, ni voté et mis sur pied par l'homme. Il tire au contraire so l'origine d'ene décret divine. En effet Allah déclare dans Quran Shareef :

« Allah fine promette à bane parmi zot ki ena la foi, et ki faire bane bons travaux, ki Li pou certainement faire de zot bane Successeurs lor la terre, pareil couma Li fine établi bane Successeurs (de parmi) bane ki ti vini avant zot ; et ki Li pou certainement établir pour zot, zot religion ki Li fine choisir pour zot ; et ki Li pou donne zot certainement en échange, après zot crainte, sécurité (et la paix) : Zot adore Moi et pas associé nannié avec Moi. Ensuite, n'importe ki sanlà ki pou ingrat après sa, sane-là-là pou au nombre de bane rebelles. » (An-Nur 24 : 56).

Le Saint Prophète Muhammad (saws) fine prophétisé à propos du Khalifatullah. Bane divers phases historiques ki l'Islam pou passer ti fini prédire par le Saint Prophète Muhammad (saws) dans sa Hadith là :

« Nabuwwat pou reste parmi zot aussi longtemps ki Allah oulé. Ensuite Li pou mette ene terme à sa et pou remplace li par l'institution Khilafat ki bazé lor précepte de Nabuwwat. Sa pou durer aussi longtemps ki Allah ouler et ensuite Li pou mette ene terme à sa aussi. Après monarchie pou prend place ki pou durer aussi longtemps ki Allah pou oulé, et sa aussi pou trouve ene la fin. Après le règne de bane tyrans pou prend place, ene règne ki aussi pou fini. Ensuite Khilafat (Khalifatullah) pou émerger ki pou bazé lor précepte de Nabuwwat... » (Musnad Ahmad).

Eski Mirza Masroor Ahmad fine émergé comme ene Khalifatullah fondé lor préceptes de bane prophètes ou eski li fine émergé couma ene Khalifa d'ene Messie, ki en plisse de sa fine élire par l'homme ? Si li déclare li Calife d'Allah et ki li fine être investi du Saint Esprit (*Ruh'il Quddus*), alors li bizin prouve sa par bane révélations divines ki li fine recevoir depuis l'an 2003 et ziska azordi, et li bizin proclamé ouvertement ki Allah fine choisir li couma le *Khalifatullah* (Calife élu d'Allah) ki bazé lor préceptes de bane prophètes.

Tout récemment aussi, plus précisément Vendredi dernier le 27 Juillet 2018 après *Jumma* Jamaat Ahmadiyya de Maurice fine faire ene l'annonce de la part de Mirza Masroor Ahmad, ene l'annonce bancaire, sans fondement et ki catégoriquement et directement contre bane l'enseignements de l'Islam – bane l'enseignements du Saint Prophète Hazrat Muhammad (saws) et du Messie Promis Hazrat Mirza Ghulam Ahmad (as) ; ene l'annonce contradictoire et remplie

de la haine contre bane ki fine reconnaite la Manifestation Divine, et ki par la suite fine être expulsé du *Nizam-e-Jamaat* (cercle/ système administratif du Mouvement Ahmadiyya) suite à zot support pour la vérité ki vine d'Allah, et bane ki fine reconnaite So Messenger.

Li (Mirza Masroor Ahmad) fine déclaré:

« Parmi banne zenfants de banne ki fine expulsés du Jamaat, banne ki oulé joinne le Jamaat et vine ene parti du Jamaat, bisin garde contact avec zotte et bisin laisse zotte vine vers Jamaat. Fauré pas décourage zotte. Bazin prend compte la prochaine génération de sa banne dimounes-la. Ou bisin prend banne actions appropriés concernant banne zenfants ki oulé joinne le Jamaat et oulé demande pardon. »

« Ca instruction-là concerne seulement banne zenfants et non pas banne ainés. Parmi ça banne zenfants-là, banne ki ena contacte et oulé vine vers le Jamaat, fine dire concernant zotte, ki bisin garde contacte avec zotte et bisin permette zotte retourne au Jamaat. Pas ti ena akène instruction concernant banne les autres dimounes ki fine expulsés du Jamaat. Si ena n'importe ki issue avec quelqu'un, alors chacun so cas pour être traiter séparément. Fine aussi donne instruction ki bisin instituer ene comité ki inclure le Missionnaire-en-Charge, le Sadr Khuddam, le Sadr Ansar, le Secrétaire Tarbiyyat et le Secrétaire Umur Amma. Ca comité-là bisin soumettre so rapport à Amir Saheb. Amir Saheb pou ensuite envoie sa rapport-là avec so banne commentaires à Markaz. »

« Seulement le Missionnaire-en-Charge ki capave personnellement garde contact avec banne ki fine expulsés du Jamaat pour persuade zotte et réforme zotte. C'est pas le devoir de Sadr Khuddam ou n'importe ki autre officier pou reste en contact avec zotte. »

« Si ene officier du Jamaat participe dans ene fonction cotte quelqu'un ki fine expulsé du Jamaat fine invité, alors ça officier-là bisin tout de suite quitte sa fonction-là. »

« Banne dimounes ki fine expulsés du Jamaat, capave laisse zot vine Masjid à condition ki zotte pas créer aukène désordre. Si ena ene l'annonce d'ene Nikah après Namaz et ça banne dimounes-là reste assiser dans Masjid pou écoute l'annonce-là, alors pena akène problème pour laisse zotte assister. Mais, si

quelqu'un spécialement invite ça banne dimounes-là dans so banne fonctions et réunions, alors ça c'est ene mauvaise pratique pour lequel bisin réprimande banne membres du Jamaat ki fine invite ça banne dimounes-là. »

Le calife Mirza Masroor Ahmad pé zoué avec sentiments et l'émotions de bane zenfants. Eski li pas conné ki d'après l'Islam, premier l'éducation ene z'enfant commence avec so bane parents ? Li pé zoué avec sentiments de bane z'enfants afin ki sa bane z'enfants là commence développe la haine dans zot lé cœur pour zot bane parents ki fine reconnaite la Manifestation Divine. Et partout li pé affiche motto : *l'Amour pour tous, La Haine pour personne*. Quel hypocrisie ! En vérité li pé sème la terreur, la frayeur dans lé cœur de bane dimounes et pé donne bane l'instructions à so bane officiers pour établir le boycotte.

Boycotte au sein de bane familles, dans bane fonctions familiales kot ene sœur pas ena le droit pou invite so frère et vice-versa. Eski c'est sa ki Quran Shareef fine enseigne nous, pou casse relations familiales ? Ene soi-disant chef spirituel couma Mirza Masroor Ahmad avec tout so l'arrogance et l'autorité sans fondement (li et so bane Amirs etc.), zot pé sème la haine au sein de bane familles et créer bane divisions et zot pé faire dimounes-dimounes vine l'ennemies. C'est ça *Dawa* de Mirza Masroor Ahmad et de so bane alentours ? Pou divise bane familles seulement parski ene partie de bane membres du Jamaat Ahmadiyya fine reconnaite et accepté la Manifestation Divine et fine croire dans sa humble serviteur et Calife d'Allah là ? Lor base de la révélation tousel, bane dimounes zot expulsés de Jamaat de Hazrat Massih Ma'oud (as) ? Bane les autres ki fine vine bane grands l'ennemies de l'Ahmadiyyat et fine renonce le Messie Promis (as) et ki fine sorti du Jamaat avec plusieurs critiques contre Hazrat Massih Ma'oud (as) et contre saki le Messie fine écrire et causer ; ziska zordi, aucaine l'annonce pas fine faire pou annonce zot expulsion ; pas fine fer nannié pou expulser sa bane dimounes ki fine faire beaucoup ditort à Jamaat du Messie Promis Hazrat Mirza Ghulam Ahmad (as). Et sa bane dimounes là zot toujours bienvenues dans tous fonctions de bane Ahmadis, fonctions familiales et pas ena boycotte ki appliqué lor zot, ki faire ? Kot la justice dans tout sa ? L'essentiel d'abord c'est ki la foi et la justice zot marche ensam. Lire sa verset Quran Shareef kot Allah pé dire :

« Ô ou ki ena la foi, tini ferme pou la justice, comme témoins Allah même (si ou ena pou témoigner) contre ou-même, ou papa, maman, ou bien ou proche parents. Ki kikaine riche ou pauvre, c'est Allah ki pou protège tous les deux. Alor pas suive ou propre désir, si ou oulé faire la justice. Mais si ou change (ou

témoignage), ou bien ou tourne les dos avec la justice... Allah au courant de saki ou faire. Ô ou ki fine accepter la foi, gagne vraiment la foi dans Allah, So prophète et sa livre ki Li fine envoie à So Prophète, et livre ki Li ti fine envoyé avant. Celui ki refuse croire en Allah, So bane anges, So bane livres, So bane messagers et le dernier jour, li sûrement fine égaré loin du bon chemin. » (An-Nisa 4 : 136-137).

La justice li ene attribut d'Allah et le fait ki nous bizin tenir ferme pour la justice veut dire ki nous vine ene témoin pou Allah même si li contre nous bane propres l'intérêts ou contre celui de nous bane proches. La justice islamique li pas pareil couma bane les autres justices couma l'homme concevoir. La justice islamique recherche bane motifs ki pli profond parski nous ena pou agir pareil couma dans la présence d'Allah Qui conne tous nous bane actions et l'intentions.

Le fait ki Jamaat Ahmadiyya fine tourne les dos avec la révélation divine - et zot fine ridiculise sa bane révélations et fine dire « *so-called revelations* » - et, zot fine aussi ridiculise la Manifestation Divine, alor la majorité de bane Ahmadis fine perdi tous bane bénédictions divines parski zot croire toujours dans bane dynasties, bane monarchies, et bane tyrans corrompus. Pour Allah, Li élève saki Li content. Pour Li, pas ena dynastie. Li choisir celui ki Li content, celui ki Li oulé.

Maintenant avec l'arrogance condescendant de Khalifa (Khalifatul-Massih V) Mirza Masroor Ahmad et so bane l'instructions bancales, ainsi ki bane chantages émotionnels ki li et so bane officiers pé faire pou effraye bane musulmans Ahmadis pour ki zot pas accepter la Manifestation Divine et pour boycotte et faire bane difficultés pour bane ki fine fini accepter la Manifestation Divine, alors mo mette li en garde, si li contigner manifester li-même coumsa, kot li pé prend li-même couma ene bondié lor la terre pou répanne la haine dans les cœurs de bane dimounes et pour casse et réduire en poussière bane l'enseignements divines, alors la punition d'Allah lor li pou terrible. Si li contigner donne bane tels l'instructions pour sépare bane familles seulement parski zot fine reconnaite la Manifestation et l'avènement d'ene Messenger et Calife d'Allah dans sa siècle là, alor li bizin attane au pire dans so condition physique, morale et spirituelle.

Le calife de dynastie fine entraîne bane conséquences bien bien fatale pour bane Ahmadis à Maurice et à travers le monde entier. Là kot nous pé guetter, sa l'esprit de fraternité islamique dans Jamaat Ahmadiyya fine disparaite et en conséquence ena désorganisation, et l'indiscipline ki pé régner. Ô bane musulmans Ahmadis,

avec sa désorganisation là, zot fine vine désemparé, et zot fine vine aveugles concernant les autres. Zot pé approuve ene système ki ni le Saint Prophète (saws) et ni le Messie Promis (as) fine approuvé. Au contraire, mo trouve zot azordi zour comme bane esclaves de zot propres désirs matériels et malheureusement zot pé laisse zot berner par ene fausse guidance ki vine d'ene calife ki en fin de compte pas conne nannié à l'Islam. Zot fine dispersés, séparés de zot familles, et li et so bane alliés pé relaxe dans zot bane luxes et zot bane pouvoirs et sa bane là pé laisse zot à zot bane propres problèmes et difficultés.

Ô Khalifa Mirza Masroor Ahmad, ou et ou bane alliés fine réduire bane l'enseignements de l'Islam en poussière. Zot prend zot supérieur à Allah et à So Messenger élu kot zot pé oppose zot à nous et certainement conséquence de bane orgueilleux, de bane ki challenge Allah pou bien fatale. Ki faire eski ou pé faire obstruction à la volonté d'Allah ? Ki faire eski ou pé réagir couma bane imbéciles au temps de bane prophètes d'Allah couma fine mentionné dans bane livres sacrés ? Alle lire dans Quran Shareef ki même Hazrat Nuh (as) so garçon pas ti croire dans li mais malgré sa li pas ti rejette so garçon kan sa grand déluge là ti pé envahir zot... Eski Hazrat Muhammad (saws) ti éloigner avec so Chacha Abu Talib malgré ki li pas ti fine croire dans l'unicité d'Allah et dans li-même comme le Messenger d'Allah ? Eski li ti mette boycotte lor so Chacha ? Eski Hazrat Ibrahim (as) ti mette boycotte lor so papa ki ti pé construire bane idoles ? Au contraire li ti pé invite so papa vers Allah. Hazrat Massih Ma'oud (as) so bane garçons pas ti croire dans li, eski li ti mette zot dehors et mette boycotte lor zot ? Coumsa ena beaucoup kitchose nous capave dire d'après Quran Shareef. Alor Gagne la crainte d'Allah et réforme-zot avant ki li trop tard.

Zot pas croire, n'est-ce pas ? Alor ki faire zot pé force bane dimounes pou pas croire aussi ? Ki faire zot pé prend place Ibliss pou empêche bane dimounes prend le chemin d'Allah ? Ki faire eski zot hautain (imbu de zot-même) et zot refuse soumettre à la volonté d'Allah ? Eski zot peur pou perdi zot bane l'autorité et zot bane richesses et zot familles et tout le prestige ki vine avec l'élection de calife élu de l'homme ?

Bondié connaît commié critiques ena concernant bane écrits du Messie Promis (as) et ena aussi plusieurs livres ki le Jamaat Ahmadiyya pas fine encore traduire. Ki faire zot pas réponde à sa bane critiques là et traduire bane livres du Messie Promis (as) au lieu sème la grains la haine et mange la chair de bane dimounes avec l'appétit ?

Allah fine crée bane êtres humains pour ki zot disperse zot à travers l'univers pour vivre en paix, en harmonie, en sécurité, pour ki zot jouir de tout saki Li fine metté à zot dispositions, tels ki, la nature, lé ciel, la terre, parmi tant d'autres. Allah (swt) fine envoie Hazrat Muhammad (saws) comme le Sceau de bane prophètes afin pou propage l'Islam avec comme but, la révélation du Quran Shareef.

L'arrogance de Mirza Masroor Ahmad et de so bane alentours li destructive ; non seulement zot vise à tout détruire lor zot passage, mais en vérité zot nek pé faire du tort à zot propres l'âmes. L'arrogance li ene vice (ene vice ki pas ena tourne-à-vis), ene défaut, ene péché, ene défaillance mentale. L'arrogance li ene caractéristique ki extrêmement blâmable. L'arrogance li ene vice de la nature humaine kot lé cœur de l'homme li rouillé avec péchés.

Ene arrogant, d'ene façon ou d'une autre li enveloppe li avec bane les autres mauvais manières tel ki la vantardise, l'orgueil, la dictature, ene style hautain vis-à-vis de bane les autres. Li oublier surtout ki à travers sa l'arrogance là, li pé éloigne li-même de bane bons qualités. L'arrogance – c'est l'orgueil – et sa l'orgueil là ena divers manifestations extérieures ki dévoile so présence. Parmi sa bane manifestations là, nous trouve l'amour, le désir pou vine à la tête de bane dimounes et pou démontrer ene statut supérieur. Ene orgueilleux ou alors ene arrogant li faire le tout pour le tout et li prend plaisir pou être toujours à la tête du Jamaat avec so bane gardes du corps etc.

Arrogant, orgueilleux, vantard, dictateur, accapareur là pas prive li-même pou humilier bane petits, bane pauvres, bane ki présente devant li pou demande li l'aide. Sa kalité arrogant là donne bane l'instructions couma Hitler, en d'autres mots, bane l'instructions couma ene dictateur, kot pas ena droit assizé, faudé pas ena kit familiarité dans bane appellations surtout en face de dictateur là, et pas ena démonstration de sensibilité ! Ena simplement ene fort degré de dédain ki affiché pour sa bane faibles, pauvres, démunis, bane ki pas possédé là.

Le quatrième Khalifa du Mouvement Ahmadiyya et so bane Mullahs et Amirs – et maintenant soutenu par le cinquième Khalifa et so bane alliés – fine traite moi de fou, de malade (*Bimaari*) et zot fine ridiculise et qualifié bane révélations ki mo recevoir de la part d'Allah couma bane « *so-called revelations* ». Zot fine accuse moi ki mo fine cause menti lor Allah, ki mo pé prêche bane fausses doctrines et zot pé amène ene campagne mensongère contre moi et mo bane disciples et la

Manifestation Divine dans so l'ensemble pour créer la haine dans les cœurs de bane Ahmadis et de bane familles de bane ki fine croire dans la Manifestation Divine de sa siècle là en particulier.

Zot pé affiche au monde « *Love for All, Hatred for None* » mais seulement zot pé calomnier ene Calife d'Allah et bane révélations divines, zot pé tourne en ridicule bane l'enseignements du Quran Shareef et bane prophécies du Saint Prophète Hazrat Muhammad (saws), ainsi ki bane écrits et l'enseignements du Messie Promis Hazrat Mirza Ghulam Ahmad (as). Zot pé applique le boycotte et donne bane hypocrites et bane pervers l'occasion pou faire désordre et zot écoute so bane malpropretés ki li dire (pareil couma ene *Zaalim* pendant Jalsa en l'an 2003-2004) pou ridiculise la Manifestation Divine de sa siècle là ainsi ki sa humble serviteur et Khalifatullah là. Zot même refuse pou paye zot bane travailleurs, mo-même (sa humble serviteur ici présent là) ene l'exemple de sa kot zot pas donne moi mo salaire et mo temps service. Zot fine dépasse tous bane bornes et sa campagne ki zot pé faire là fine dépasse le point de non-retour.

Face à tous sa bane pressions là, nous fine montré ene patience exemplaire et nous fine subir tout seulement pour la cause d'Allah. Tous bane z'efforts ki nous fine entreprendre pour faire zot comprend bane kitchoses d'ene manière civilisée pas fine abouti à nannié. Mo ti averti zot clairement de bane conséquences de sa campagne mensongère et non-islamique là. En tant ki Khalifatullah, et le Chef Spirituel international du Jamaat Ul Sahih Al Islam, mo fine décide pou lance ene défi à tous bane ki consciamment ou inconsciamment pé donne ene coup de main à ene tel campagne, et mo dire zot vine de l'avant pou mesure zot à mo Jamaat Ul Sahih Al Islam et moi-même kot nous amène sa z'affaire là devant la Cour d'Allah afin ki Li puni d'ene façon exemplaire bane ki coupables dans So lizié. Et ki bane chercheurs de vérités et bane ki vraiment sincères capave gagne l'occasion pou faire la distinction entre le vrai et le faux à la lumière de saki Allah pou décider. *Insha-Allah.*

Pour terminer mo bane frères et sœurs ! L'annonce ki fine faire par bane Mullahs et zot bane Amirs sous l'instruction de zot Khalifa avec tout zot l'arrogance et jalousie li bancale, contradictoire et sans fondement. Pour l'amour d'Allah, pense à l'avenir spirituel de zot bane z'enfants. D'ailleurs zot ena bane l'exemples devant zot avec bane z'enfants ki soi-disant dédiés (*Waqf-e-Naw*). Nous capave dresse ene la liste bien longue de tous zot bane méfaits et caractères. Sa bane z'enfants là zot bane z'enfants ki fine perdu (égarer) avec zot bane mauvais

fréquentations et bane transactions douteux lor zot les dos. Mais malgré ki zot fine égarer physiquement, moralement et spirituellement parlant, mais nannié pas fine faire concrètement pour faire corrige zot bane erreurs pour ene lendemain meilleur. Zot prend bane actions bien sévères contre bane dimounes ki fine reconnaite bane manifestations, signes et le Messenger d'Allah, mais quant à bane ki prend réellement le chemin de la destruction, sa bane là zot protégé et pas mette zot dehors parski zot familles zot la plupart du temps bane hauts-placés du Jamaat (Jamaat Ahmadiyya) et zot bane familles trouve toujours dans Jamaat. Pour zot, na pas ena sanctions, ni boycottte !

Donc, Ô bane chercheurs de vérité, bane ki vraiment content Allah et l'islam, pense à l'avenir spirituel de zot bane z'enfants. Enseigne zot bane vrais l'enseignements de l'islam, et non pas bane l'enseignements ki alle à l'encontre même de saki l'islam prêcher. Empêche sa bane z'enfants là pour être piétinés par bane kitchoses mondaines, et bane la drogues et bane boissons alcooliques, cigarette, bane jeux de hasard etc.

Donne-zot vrai guidance, et encourage zot pou reconnaite la Manifestation Divine de sa siècle là. Encourage-zot pou vine bane bien-aimés d'Allah. Rappelle zot ki tous bane prophètes et même le Messie Promis (as) ti donne zot le même conseil. En vérité mo ene conseiller sincère pour zot. Dans sa siècle là, Allah fine envoie zot la guidance sous la bannière de l'islam, du Sahih al Islam. Vine vers la lumière divine et encourage zot bane z'enfants pour faire de même, afin ki sak futur descendant zot bénéficier d'ene la lumière pour éclairer le monde jusqu'à so la fin.

À ce moment là, la foi et la sincérité ki revivre dans zot pou donne zot ene résultat excellent. Ene la brise léger pou faire flambe bane étincelles spirituelles ki trouve dans zot et le monde pou illuminé de bane bénédictions divines par l'intermédiaire de sa bane jeunes là.

Nous plus grand problème actuel c'est celui pou instruire nous bane jeunes et tous bane ki fine nés musulmans dans sa grand religion ki l'islam été là. C'est nous devoir pou protégé zot contre fracas létemps et l'influence matériel empoisonné. Bizin imbibe dans zot ene la vie spirituelle. C'est dans sa kalité la vie là ki nous oulé faire nous bane jeunes marcher de nos jours. Bizin faire bane jeunes bien comprend ki zot bizin ena la crainte d'Allah et non pas la crainte de bane créatures ou Khalifa. Bizin prier ene sel Bondié, non pas faire Khalifa (que ce soit élu d'Allah ou de l'homme) vine zot idole.

Li malheureux pou tanne ene Amir du Jamaat Ahmadiyya à Maurice, Mons. Moussa Taujoo dire lor Youtube à l'occasion de Eid-ul-Fitr 2017 ki tous bane Ahmadis bizin attache zot avec Khalifa, ki le Khalifa bizin vine dans sak la caze et sak lé cœur. Kot pou place Allah alors ? Li malheureux ki petit à petit sa bane kalité dimounes là fine efface Allah de zot l'existence et zot pé encourage les autres pou faire pareil. Bane photos du calife élu de l'homme partout de nos jours dans bane la caze et bane la rues. Li bien grave saki zot pé faire. Sous prétexte de l'amour et de la paix, zot pé mutile bane l'enseignements d'Allah. Commié bas zot fine tomber parski zot fine prend même chemin et suive même pas de bane ki auparavant fine calomnier bane prophètes et le Messie Promis du siècle passé.

Ki Allah accorde So bane faveurs et bénédictions à nous bane z'enfants Sahih al Islam et à nous futurs descendants et empêche nous pou alle vers la décadence. Ki Allah donne nous la force pou franchi bane barrières ki barre nous chemin afin ki nous capave atteindre le but ultime. Pour Jamaat Ul Sahih Al Islam, nous salut trouve dans la volonté d'Allah. *Ameen ! Soumma Ameen, Ya Rabbul Aalameen.*